



Bentiaraq Ottosen
Atassut

UKA 2024/89
13. november 2024

Ilinniarnertuunngorniarfiit aamma ilinniarsiit ingerlaqqiffiusut pillugit inatsisit allannguuteqarnissanik siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, tamatumani qulakkeerneqaqqullugu inuussuttut ilinniarsiini aamma ilinniarsiinni ingerlaqqiffiusuni soraarummeerni, ilinniartut kalaallisut oqaatsiminnik atuisinnaanissaat pisinnaatitaaffittut inissinneqassasoq.

(Inatsisartunut ilaasortaq Najaaraq Møller, Siumut)

Ilinniartitaanikkut siuarsaassagutta paasinarpoq pissusissamisoorlunilu ilinniartut aallaavigalugit tulluarsaassagutta. Atassummiillu ajortussaqaqtinngilarput kalaallisut nammineq oqaatsit atorlugit misilitsissinnaaneq pisinnaatitaaffittut atuutilissappat.

Assersuutigiinnarlugumi ilinniarnertuunngorniarfimmi inuiaqatigiilerinermi Kammerat Napoleon danskisut, tuluttulluunniit Animal Farm atuarsimallugu misilitsinnermi makikkaanni paasinarluarpoq ulluinnarni kalaallisut oqaluttuulluni nassuiaalluarumalluni kalaallisut misilitsikkumasoqassappat. Tamannalu taperserparput.

Atassummiilli oqaatigiuarparput meeqqatta sapinngisamik oqaatsinik amerlanerpaanik ilinniarnissaat kaammattuutugalugu. Pikkorinnerusariaqarpugummi, tamatta. Qitornagummi kissumiaannarniartuarutsigit aqutissaallu sanertuarlugu naatsorsuutigiuaassavaat nunarsuaq taakkununga tulluarsartuassasoq. Pingaartumillu nunanut allanut ilinniarniaraanni, feriaranni, allatullu oqaluttut siunissami suleqatigisagaanni arlalinnik oqaaseqarsinnaanissaq iluaqutaalluassaaq.

Pikkorinnerussaguttalu tulluarsallaqqissuusariaqarpugut, ilinniartitaanikkut, atorfigisatsinnut, nunarsuaqataanitsinnullu. Naatsorsuutigissanngilarpummi nunarsuarmioqatitta tulluarsarfigisassagaatigit. Taamaammat piumasqaateqarsinnaaneq qunuginagu meeqqagut sukataaqqusinnaasariaqarpagut. Siulersuattami sila pinngortitarsuarlu tulluarsarfigalugit inuupput, tulluarsallaqqinnerlu uumaniallaqqissusigalugu.

Nammineerneruleriartussaguttalu pingaarluinnarpoq sukataarnissarput, angusarissaarnissarput, immitsinnullu annerusumik piunaffigaluta. Akisussaaffimmi tamakkiisoq politikkerinut tunniunniartuaannarsinnaanngilarput, akisussaaffik annerpaaq inuttut nammineq pigaarput. Inuillu utaqqiinnartussatut inississanngikkutsigit tatiginnerusariaqarpagut, sapinngilagammi. Sapinngerujussuarparput. Taamatullu oqaaseqarluta siunnersuut taperserlugui ataatsimiititaliamut innersuupparput.